



UNIVERSITÄTS-
BIBLIOTHEK
PADERBORN

Universitätsbibliothek Paderborn

Historiae Societatis Iesv Pars ...

Pars Tertia Siue Borgia

Orlandini, Nicola

Antverpiae, 1649

Patribus, Fratribusque Societatis.

urn:nbn:de:hbz:466:1-14153

Patribus, Fratribusque Societatis.



ANACHORETARVM virtutes eximias Anachoreta & ipse nobilis dum narraret Copres, ab auditore visus est ea, quæ diceret è codice pulcherrimo aureis scripto literis recitare. Idem mihi quoquē euenire (Venerandi Patres, Fratresque) nostrorum Patrum res memoranti, haud pro dubio equidem habeo. Etenim quæ pro Dei gloria, & salute mortalium gesta per eos sunt, quæque generosa indole quotidie geruntur à vobis, in libro vitæ non auro scribi modo, sed insculpi etiam manu cælesti dubitare non licet, scientibus vel gelidæ pocillum piè præbitum in diuina ratione imputari. Ceterum illud dolendum est mihi, quæ monumentis æternis, & Superum scriptura cohonestantur, vsque adeo malè excribi à me, ac propemodum deformari. Et profectò si qua pars Historiæ nostræ aureo digna stylo est, uti planè sunt omnes, id certè hæc, quam in præsentia edimus, tertia, præcipuo quodam iure postulat. Quam enim dignitatem orationis, quam styli venustatem, quod pretium literarum non mereantur sanctissimi adolescentes (ut ceteros interim fileam) beati, inquam, illi in corporibus humanis Angeli, Rodulfus Aquaviva, inclytus postea mortis ab Ethnicis obitæ triumphator, & Stanislaus Kostka Confessor egregius: quorum alterius præclarissima initia, alterius etiam felicissimus exitus proditur? Qui deinde colores eorum ex merito laudes exornent, quorum sanguine christiana sacra, decorata sunt? Nullam enim habuit Societas nostra ætatem virorum religiosè fortium sæcundiorē. Hic Florida Orbis noui Prouincia quàm maligna frugum, tam benigna heroum, qui sanguinem ab Ethnicis in odium fidei exhaustum generosè dederunt, continuo illum, cuius nimis est pressa vestigijs, tum alios, atque alios in flores commutat IESV nomen inscriptos. Hic inter Oceani prope inobservabilem vastitatem illustris signatur limes, per quem ignotis antiquitati terris, & gentibus Euangelium inferatur. Ignatij enim Azebedij, cumque eo, & Petro Diazio egregiarum tot victimarum gloriam, quam deceret non atramento oblini, sed pretiosissimis quibusque commendari succis, omnibusque non colorum, sed & odorum suauitatibus dedicari? Prætereo inter Sarmatas tanto religionis subsidio propagatam familiam: penetrata Orbis noui ditissima Regna Peruuium, Mexicumque, per totum Septentrionem depugnata cum Hæreticis mira animi excelsitate bella. Hæc, & alia de genere hoc præstan-

stantissima vt transeantur, age Franciscus Borgia ordinis ductor, idemque princeps huius voluminis argumentum, illa viri tanta pro Christo nuditas, illa sui tanta contemptio, obscuritatis illa inexplebilis ambitio, quod præconij lumen, quas notitiæ publicæ quasi opes non exigunt? Atque vt nihil hoc tempore sanctum, ac cæleste non esset, accessit ipsa summi quoque Pontificis veneranda sanctitas Pij Quinti: si tamen fas est dicere accessisse eam, cum potius indè æquum sit existimare in membra velut ex capite permanasse. Iure igitur & materiæ, & ætatis aureæ scriptori optandum esset perinde ingenium, & os aureum: vt quæ in celestibus illis vitæ codicibus tantopere fulgent, quamleuissimè tenebris humanis obscurarentur. Ceterùm illud habeo solatij, quod quicquid in hac nostra quantulacumque molitione deest, cum pro dignitate sit ibi iam consignatum, extra aleam periculi est: ac ferius, ocyùs, aliquando tandem Beatorum honoribus, cumulatam fœnore adiungetur. Denique materia sancta, & vestro potius ingenio, eloquioque digna, etsi meis sermonibus (vt cum Sancto Paulino loquar) velut atro habitu vestiatur, speciem tamen diuini luminis, & interni decoris, quanquam in egenæ suppellectilis vtilitate custodit. Et vos, quorum pietati labores nostri potissimum seruiunt, sic eruditos habetis, perfectosque oculos, sic attemperatam cælestibus aciem; vt per has quamlibet atras notas, aureas dispicere illas possitis: prorsus digni, qui, & legatis aurea, cum faciatis. Vos enim estis, qui, vt Sanctus Cyprianus ait, quod nos verbis conscripsimus, factis impletis. Benè in æternum valete. Romæ Anno Domini M. D. C. XXII.

Ep. 9. ad
Seu. in fi-
ne.

L. 3. ep. 3.
in f.

HISTO-